

Uunga siunnersuut: Imigassat ilaannut Kalaallit Nunaanni sananeqarsimasunut akitsuutit pillugit Inatsisartut inatsisaata allanngortinneqarnissaa pillugu Inatsisartut inatsisaat

(Aningaasaqarnermut Nunanilu Avannarlerni suleqatigiinnermut Naalakkersuisoq)

Saqqummiussissut

(Aningaasaqarnermut Nunanilu Avannarlerni suleqatigiinnermut Naalakkersuisoq)

Siullermeerineq

Naalakkersuisut sinnerlugit matumuuna imigassat ilaannut Kalaallit Nunaanni immiugaasunut akitsuutit pillugit Inatsisartut inatsisaata allanngortinneqarnissaa pillugu Inatsisartut inatsisaata allanngortinneqarnissaanut siunnersuut saqqummiutissavara.

Imigassat ilaannut Kalaallit Nunaanni Immiugaasunut akitsuutit pillugit Inatsisartut inatsisaanni siunertarineqarpoq, Kalaallit Nunaanni inuussutissarsiutigalugu imigassanik sananeq, aammali inatsimmut ilaavoq imigassanik nammineq atugassanik akitsuusigassaasunik sananeq.

Inatsisartut inatsisaanni pingaartumik siunnerfigineqartoq aamma inatsimmi pineqaatissiisarnerit pillugit aalajangersakkanut tunngatillugu aamma atuuppoq.

Naalakkersuisut tamatumunnga atatillugu malugisimavaat, imigassamik nammineq sanasoqarluni imaluunniit uninngasuuteqartoqarluni pisoqarnerani pineqaatissiisarnermut aalajangersakkat aamma atuunnissaasa qulakkeernissaanut tunngatillugu, pineqaatissiisarnermut aalajangersakkat naammaginartumik ersarissuseqanngitsut.

Tamanna tunngavigalugu siunnersuummi siunertaavoq, inatsimmi pineqaatissiisarnermut aalajangersakkat erseqqissarneqarnissaat, taamaalilluni pineqaatissiisarnermut aalajangersakkat atuuffissaat qularutigineqassanani.

Siunnersuut iluanaaruteqarnikkut imaluunniit allaffissornikkut sunniuteqassasoq naatsorsuutigineqanngilaq.

Naggasiutigalugu inatsisissatut siunnersuut tassungalu nassuiaatit innersuussutigissavakka.

Taamatut oqaaseqarlunga Naalakkersuisut sinnerlugit siunnersuut Inatsisartunut kajumittumik suliassanngortippara.